

# Акафист Пресвятой Богородице в честь иконы Ея «Достойно есть», ( «Милующая»)

*Празднование 11/ 24 июня*

## ***Кондак 1***

Избранней Богом от человеческого рода послужити воплощению предвечнаго Слова, преблагословенней Деве Богородице, достойно воспеваемой от ангел на небеси, мы грешнии на земли дерзаем приносить хвалебное пение; еже милостиво от нас приемши, всемилующая Царице Богородице, от всяких бед нас спаси и вечных мук свободи, да зовем Ти:

Радуйся, христианом помощнице и милосердая о грешных предстательнице.

## ***Икос 1***

Архангел Гавриил с небесе послан бысть от Тебе, Богородице, к смиренному послушнику Горы Афонския, в пустынной келии воспевавшему Ти хвалебныя песни пред святою Твоею иконою, да научит его пети песнь небесную, еуже славословят Тя ангели в Сионе горнем. Темже и мы дольнии, вспоминая таковое Твое о людех благопромышление, со благодарением вопием Ти сице:

Радуйся, достойно восхваляемая от Архангел и Ангел; радуйся, ублажаемая от всех небесных сил. Радуйся, присноблаженная и пренепорочная; радуйся, Мати Бога нашего. Радуйся, честнейшая Херувим; радуйся, славнейшая без сравнения Серафим. Радуйся, без истления Бога Слова рождающая; радуйся, воистину сущая Богородице. Радуйся, величаемая на небеси и на земли; радуйся, воспеваемая горними и дольными. Радуйся, едина благословенная в женах; радуйся, израстившая нам плод живота.

Радуйся, христианом помощнице и милосердая о грешных предстательнице.

## ***Кондак 2***

Видев послушник пустынный дивнаго пришельца, в келию его пришедшаго и песнь пресладкую Тебе, Владычице, воспевшаго, не уразуме в нем ангела быти, но зело усладися пением его небесным и проси, да напишет ему словеса поемья песни: егда же узре, яко под перстом его каменная дска умягчися, и пишемая словеса на ней углубишася яко на песце, позна в сем чудесное действо и возопи к рождшемуся от Тебе Богу Слову: Аллилуия.

## ***Икос 2***

Разумом богоозаренным новую песнь открывая, рече Архангел послушнику, яко тако воспевают Тя, Богородице, ангелов лица в обителях горних, и повеле ему, да возвестит человеком словеса песни небесныя и научит их ангелоподобно пети Тебе:

Радуйся, благодатная Марие; радуйся, яко Господь с Тобою. Радуйся, благословенная в женах; радуйся, неискусобрачная Родительнице Бога Слова. Радуйся, непорочное селение Духа Святаго; радуйся, зачатие несказанное явившая. Радуйся, рождество нетленное показавшая; радуйся, Матерью и Девою пребывшая. Радуйся, во обою непорочно и свято себе сохраняющая; радуйся, Ангелов чистотою Твоею превозшедшая. Радуйся, горних умов не престающее удивление; радуйся, человеческого рода возвышение.

Радуйся, христианом помощнице и милосердая о грешных предстательнице.

## ***Кондак 3***

Силою Божиею Гавриил Архангел твердый камень в мягкий воск претвори и на нем перстом своим написа словеса песни хвалебныя Тебе, Богородице, да вси познают великое чудо и несумненно уверуют, яко тако воистину воспевают Тя горе силы небесные, имже подражающе, и мы поем величия Твоя, Дево, и в радости духовней вопием прославльшему Тя Богу: Аллилуия.

## ***Икос 3***

Имея простоту душевную и непорочное сердце, послушник смиренный сподобися ангельския беседы и лицезрения чиновачальника горних сил, мы же, лукавством и злобою потемненнии, со трепетом взирающе на святую икону Твою, Владычице, молим Ти ся прилежно, обрати ны от злб наших и научи нас во смирении и кротости духа глаголати Тебе:

Радуйся, Гору Афонскую освятившая Твоим благодатным присутствием; радуйся, холмы и дебри ея исполнившая славою Твоих чудес. Радуйся, ангельскаго явления сподобльшая пустынножительство Афонское; радуйся, обители иноческия в нем умножившая во спасение душ человеческих. Радуйся, и всем в посте и молитве пребывающим обещающая Твое заступление; радуйся, от треволения моря житейскаго спасающая кающихся. Радуйся, благодать Сына Твоего и Бога низводящая на места, Тебе посвящаемыя; радуйся, рай мысленный показавшая храмы Божия. Радуйся, пристанище небурное содевающая в оных ищущим спасения; радуйся, всем потребным ко благочестию нас снабдевающая. Радуйся, жительствующим богоугодно подательнице благ временных и вечных;

радуйся, ходатаице нам Царствия Небеснаго.

Радуйся, христианом помощнице и милосердая о грешных предстательнице.

#### ***Кондак 4***

Буря недоумения смути старца инока, егда услыша песнь новую и чудну из уст своего ученика и узре дску каменну, яко воск, начертание приимшу: егда же уведо о посещении дивнаго посетителя, Гавриила нарекшагося, уразуме, яко той сей есть, иже древле благовести Тебе, Дево, безсеменное зачатие Бога Слова. Темже величая величия Твоя, Царице горних и дольних, воспеваше радостно ангелов и человеков Творцу: Аллилуия.

#### ***Икос 4***

Слышавше о посещении Архангелове иноцы Горы Афонския, стекахуся видети дску, на нейже преестественно начертана быша письма песни небесныя, и воспеваху Тя благоговейно пред святою иконою Твоею, Владычице, пред неюже воспе Тя Архангел. Приими убо и наша приносимыя Тебе молитвы с пением таковым:

Радуйся, яко о Тебе радуется ангельский собор; радуйся, яко о Тебе торжествует человеческий род. Радуйся, на руку Твоею носившая Носящаго всяческая; радуйся, вместившая во чреве Твоем Невместимаго всем миром. Радуйся, Создателю Твоему плоть заимодавшая; радуйся, Краснейшаго паче всех сынов человеческих рождшая. Радуйся, млеко питавшая Питающаго всяческая; радуйся, попечение имевшая о Сыне Твоем, сущем Промыслителе всея твари. Радуйся, похвало девства; радуйся, матерей славо. Радуйся, в рождестве девство сохраняющая; радуйся, рождество с девством сочетавшая.

Радуйся, христианом помощнице и милосердая о грешных предстательнице.

#### ***Кондак 5***

Боговидец Моисей иногда на каменных скрижалех Закон Божий, начертанный перстом Божиим, получи, иноцы же Горы Афонския песнь небесную во славу Богоматере, на дске каменной начертанную, от Архангела прияша и, сим наученнии ангельское славословие Тебе приносят, воспеша тако благоволившему о них Богу: Аллилуия.

#### ***Икос 5***

Видевше начальницы Горы Афонския чудо велие в явлении Архангелове и песни новей, дску с начертанными от Ангела письмены препроводиша к царю и патриарху Цареграда, во уверение истины преславнаго сего чудесе; тии же радостно прияша ю, яко залог

благоволения Божия во всей Церкви Православней, узакониша воспевати песнь ангельскую в похвалу Тебе, Богородице, и взываху Ти во умилении сице:

Радуйся, преукрашенная лепотами всех добродетелей Дево; радуйся, Невесто невестная. Радуйся, возрастившая цвет неувядаемый, Христа; радуйся, раю словесный, Древо жизни нам прозябшая. Радуйся, сене небесная, от зноя страстей нас сохраняющая; радуйся, покрове миру, ширший облака. Радуйся, древо благосеннолиственное, прохладу спасительную верным подающее; радуйся, источнице воды живыя, от неяже пияй ктому не умирает. Радуйся, Судии праведнаго умоление; радуйся, грехов наших прощение. Радуйся, во славе небесней одесную Бога пребывающая; радуйся, земнородных милосердием Твоим не оставляющая.

Радуйся, христианом помощнице и милосердая о грешных предстательнице.

### ***Кондак 6***

Проповедует святая Церковь величие чудес Твоих, Марие Богородице, и светло красуется, воспевая Ти песнь ангельскую, от небес на землю принесенную чиновначальником горних сил Гавриилом; с нимже помолися, Госпоже Пречистая, к Сыну Твоему и Богу, да незыблему во благочестии сохранит Церковь Свою и посрамит вся востания еретическая и раскольническая, нас же, чад ея, сподобит неосужденно воспевати Ему: Аллилуия.

### ***Икос 6***

Возсияла еси многими лучами чудес, о милостивая Богомати, чрез святую икону Твою, Владычице, и сими не точию Гору Афонскую, но и множайшая места озарила еси, да научимся звати Тебе:

Радуйся, радости наша, улаждающая скорбныя сердца, к Тебе отверстыя; радуйся, благая заступнице, на помощь к нам ускоряющая. Радуйся, залог спасительный нам в иконе Твоей даровавшая; радуйся, Афонскую Гору и многия страны ею прославльшая. Радуйся, надеждо наша известная; радуйся, упование наше непостыдное. Радуйся, скорбей наших разрешение; радуйся, печалей наших утление. Радуйся, веры православныя утверждение; радуйся, неверия и зловерия посрамление. Радуйся, любви Божественныя явление; радуйся, чудес преславных совершение;

Радуйся, христианом помощнице и милосердая о грешных предстательнице.

### ***Кондак 7***

Хотящим жати спасение милостивая покровительница и помощница являешия, Мати Божия, и присно ходатайствуеши за них к Сыну

Твоему и Богу, аще бо кто и падает в некое согрешение, немощию плоти обложен, обаче Тобою возстание получает во спасение, яко всем хочещи спастися и в разум истины приити воспевающим Христу Богу: Аллилуия.

### ***Икос 7***

Ново небо и нова земля уготованы от Сына Твоего и Бога любящим Его, Госпоже всеблагая, к нимже стяжахом Тя путеводительницу изрядну. Темже молим Тя, не попусти нас погибнути в дебрех греховных, но приведи нас стезею правою в страну света и радости вечная, да Тебе вопием хвалебно:

Радуйся, Сиона горняго первейшее украшение; радуйся, обителей дольних присноготовое заступление. Радуйся, земле благая, клас спасительный миру израстившая; радуйся, ниво неоранная, оплодотворенная Духом Святым. Радуйся, огонь Божества во чрево Твое приемшая; радуйся, глад падшаго человечества хлебом жизни утолившая. Радуйся, престоле Царя славы; радуйся, палато преукрашенная Вседержителя. Радуйся, храме одушевленный Триипостаснаго Бога; радуйся, дворе Господня, еюже Сын Божий пройде к нам.

Радуйся, христианом помощнице и милосердая о грешных предстательнице.

### ***Кондак 8***

Странное явление Архангела, на Горе Афонстей иногда бывшее, смотрение бысть божественное, имже прославися всепетое имя Твое, Марие Богородице, и вси вернии научишася ангелоподобно воспевати Тя, Херувимов честнейшую и Серафимов славнейшую Матерь Бога нашего, о Нейже радуется всякая тварь, и род человеческий благодарно взывает ко Господу: Аллилуия.

### ***Икос 8***

Все упование наше на Тя возлагаем, Мати Божия, и в скорбех наших к святей иконе Твоей усердно притекаем, чающе от нея утешение благодатное получитьи. Помози убо нам, Владычице, с терпением и благодарением всякия скорби переносити и вместо ропота малодушнаго благоумиленно взывати Тебе:

Радуйся, всех скорбящих радости; радуйся, всех печальных утешение. Радуйся, труждающихся и обремененных сладкий покое; радуйся, болезнующих и огорченных живительная отрадо. Радуйся, в час скорбных недоумений мысль благу на сердце полагающая; радуйся, во дни уныния надеждою вечных благ воодушевляющая. Радуйся, искушаемым руку помощи простирающая; радуйся, гнев Божий от глав наших отводящая. Радуйся, мирное устройство

обуреваемым напастями подающая; радуйся, во благих желанья наша дивно исполняющая. Радуйся, терпеливых страдальцев дарами благодатными увенчающая; радуйся, всех благоподвизающихся блаженства райского сподобляющая.

Радуйся, христианом помощнице и милосердая о грешных предстательнице.

### ***Кондак 9***

Вси Ангели небеснии немолчными похвалами Тя ублажают, Царице и Владычице всея твари, мы же земнии и перстнии кую похвалу достойную принесем Ти, Всепетая; обаче надеющиеся на милосердие Твое неисчетное, любовь к Тебе понуждаеми, поем чудеса Твоя, проповедуем благодеяния Твоя, славословим имя Твое и, усердно припадая ко святей иконе Твоей, рабски вопием изображенному на ней в купе с Тобою Богомладенцу Христу: Аллилуия.

### ***Икос 9***

Витий риторстии глаголы не довольни к пению чудес Твоих, Богородице, обаче благая сущи, веру нашу, вместо риторскаго благословесия милостиво прими, веси бо и любовь нашу, еуже сердца наша к Тебе исполнены. Темже благоутробно услыши нехитростныя наша песни, имиже дерзаем благохвалити Тя сице:

Радуйся, сопрестольное Отцу Слово в ложеснах Твоих вместившая; радуйся, Свет незаходимый рождающая. Радуйся, жизнь вечную миру даровавшая рождеством Твоим; радуйся, Превечнаго, яко младенца, на руку Твоею носившая. Радуйся, граде одушевленный Всецаря; радуйся, скиние освященная живаго Бога. Радуйся, нижняя сочетавшая с вышними; радуйся, миротворице, Божественнаго мира преисполненная. Радуйся, добрых виновная; радуйся, злых пременение. Радуйся, оружие на враги всекрепкое; радуйся, щите верных несокрушимый.

Радуйся, христианом помощнице и милосердая о грешных предстательнице.

### ***Кондак 10***

Спасительное прибежище от сует мира прелестнаго явися жребий Твой земный, святая воистину Гора Афонская, Богородице Дево, ознаменованная многими Твоими чудесы. Но и на всяком месте с любовью призывающих Тя услыши и заступи. Сына же Твоего умоляти не престай, Всеблагая, да не отступна пребывает благодать Его от мест, идеже в собрании верных поется Ему хвалебная песнь: Аллилуия.

### ***Икос 10***

Стена еси девственником, преблагословенная Дево, и столп крепок от лица вражия всем подвижником благочестия: Тебе бо дадеся велия сила темныя адския силы побеждати и от искушений их душепагубных человеки избавляти, наипаче же тех, иже целомудренно и свято на земли пребывают. Сего ради девства и целомудрия рачители согласно Тебе зовут:

Радуйся, чистотою сияющая паче солнца; радуйся, девства начало и освящение. Радуйся, крине, облагоухавший падшее человечество; радуйся, во смирении Твоем осененная благоволением Всевышняго. Радуйся, верная рабо Господня; радуйся, яко Тя блажат вси роди. Радуйся, яко сотвори Ти величие сильный; радуйся, яко соцарствуеши с Сыном Твоим во славе вечней. Радуйся, ходатаице Божия к людем благоволения; радуйся, грешных к Богу дерзновение окриляющая. Радуйся, неистощимый источниче милостей и щедрот; радуйся, преисполненная сострадания к страждущим.

Радуйся, христианом помощнице и милосердая о грешных предстательнице.

### ***Кондак 11***

Пение наше, аще было бы и тьмочисленное, не довлекло бы к достойному прославлению милостей Твоих, преблагословенная Мати Божия, яже непрестанно изливаеши роду нашему; обаче да не неблагодарни явимся пред Тобою, по силе нашей похвальная восписуем Ти с верою и любовью и, вспоминая неисчетная чудотворения Твоя, вопием верховному Творцу чудес Богу: Аллилуия.

### ***Икос 11***

Светоподательными лучами чудес икона Твоя, о всемилостивая Владычице, на святей Горе Афонстей и повсюду немерцаемо сияет и весь мир православный благодатно просвещает. Сего ради грядут к ней от лет древних на поклонение православных собори, умиленно воспевая пред нею благохваления Ти таковая:

Радуйся, Царя Христа миру явившая; радуйся, на иконе Твоей вкупе с Ним изображенная. Радуйся, клеще таинственная, Исаиею провиденная; радуйся, купино неопалимая, боговидцем Моисеем предзримая. Радуйся, руно орошенное Гедеона; радуйся, чаще приосененная, Аввакумом воспетая. Радуйся, двери затворенная, Иезекиилю показанная; радуйся, горо несекомая, Даниилу явленная. Радуйся, многообразно от пророк предвозвещенная; радуйся, пророческих речений сбытие явившая.

Радуйся, христианом помощнице и милосердая о грешных предстательнице.

### ***Кондак 12***

Благодати причастная Твоя икона, Богородице Дево, яко сокровище драгоценное, Церкви Христовой от Тебе подадешся, в ней бо обещалася еси с нами быти до скончания века, рекши о первоначертанной Твоей иконе: «С нею благодать Моя и сила!» Веруем, Всепетая, яко не оскудеет глагол Твой сей, и яко во иконе Твоей святей на всяцем месте и zde с нами пребываеши, идеже верно поется Сыну Твоему и Богу хвалебная песнь: Аллилуия.

### ***Икос 12***

Поюще чудеса Твоя, Богородице, припадаем усердно ко святей иконе Твоей, лобызаем ю с сердечною любовию, и яко присно сущей с нами, молим Ти ся: воззри на ны милосердием Твоим, Мати Божия, и якоже Тя зрим ныне на иконе изображенную, тако сподоби нас узрети Тя в час грозный смертный, от руки диаволи нас исхищающую и в Царствие Христово приводящую ны державною десницею Твоею, да Тебе благодарственно взываем:

Радуйся, по Бозе первое наше прибежище и покрове; радуйся, матернею любовию Твоею весь мир христианский объемлющая. Радуйся, во святом житии верная утверждающая; радуйся, благу христианскую кончину им подающая. Радуйся, от власти лютаго миродержца уповающих на Тя избавляющая; радуйся, на мытарствах воздушных заступающая славящих Тя. Радуйся, врата райская нам отверзающая; радуйся, Царствие Небесное любящим Тя ходатайствующая. Радуйся, во славе небесней приседая Сыну Твоему и Богу; радуйся, во общении славы Его и чтущия Тя вводящая. Радуйся, телес наших здравие; радуйся, душ наших спасение.

Радуйся, христианом помощнице и милосердая о грешных предстательнице.

### ***Кондак 13***

О Всепетая Мати, рождшая святых святейшее Слово, от Ангел воспеваемая на Небеси и от человек славимая на земли! Приими милостиво сие малое моление наше и даруй душевное спасение и телесное здравие всем, верно чтущим Тя и поющим Богу: Аллилуия.

*(Этот кондак читается трижды, затем икос 1 и кондак 1)*

### ***Молитва***

О пресвятая и премилостивая Владычице Богородице! Припадающе к святей иконе Твоей, смиренно молимся Тебе: вонми гласу моления нашего, виждь скорби, виждь беды наша и, яко любвеобильная Мати,

потщися на помощь нам беспомощным, умоли Сына Твоего и Бога нашего, да не погубит нас за беззакония наша, но явит нам человеколюбно Свою милость. Испроси нам, Владычице, у благодати Его телесное здравие и душевное спасение, и мирное житие, земли плодоносие, воздуха благорастворение, и благословение свыше на вся благая дела и начинания наша, православному воинству нашему на вся враги победу и одоление. И якоже древле призрела еси милостиво на смиренное славословие послушника афонскаго, воспевавшего Тя пред пречистою иконою Твоею и послала еси к нему Ангела научити его пети песнь небесную, еюже славословят Тя Ангели; тако и ныне приими наше усердное молитвословие, Тебе приносимое. О Царице всепетая! Прости ко Господу богоносней Твоя руке, имиже Богомладенца Иисуса Христа носила еси, и умоли Его избавити нас от всякаго зла. Яви, Владычице, Твою милость к нам: болящия исцели, скорбящия утеша, бедствующим помози и сподоби нас благочестно житие сие земное совершити, христианскую непостыдную кончину получитьи и Небесное Царствие наследити Матерним ходатайством Твоим к рождшемуся от Тебе Христу Богу нашему, Емуже со Безначальным Его Отцем и Пресвятым Духом подобает всякая слава, честь и поклонение ныне и присно, и во веки веков. Аминь.